



Broj: 04-04-4-3680/22
Sarajevo, 15. 12. 2022. godine

**SAOPĆENJE ZA JAVNOST O OBJAVLJENOM IZVJEŠTAJU REVIZIJE UČINKA
„UPRAVLJANJE ROBNIM REZERVAMA U FEDERACIJI BiH“**

Ured za reviziju institucija u Federaciji Bosne i Hercegovine proveo je reviziju učinka o temi „**Upravljanje robnim rezervama u Federaciji BiH**“. Cilj revizije bio je ispitati sistem upravljanja robnim rezervama u Federaciji BiH, što uključuje regulatorne i institucionalne pretpostavke, te planiranje, nabavke, skladištenje i intervenisanje robnim rezervama.

Ispitane su aktivnosti Federalne direkcije robnih rezervi i direkcija robnih rezervi iz pet kantona: Tuzlanskog, Zeničko-dobojskog, Bosansko-podrinjskog, Hercegbosanskog i Kantona Sarajevo, kao i Poljoprivrednog zavoda Unsko-sanskog kantona koji vrši ulogu direkcije za robne rezerve u ovom Kantonu. Obuhvaćena je i Vlada FBiH s aspekta njene uloge u upravljanju robnim rezervama u Federaciji BiH. Vremenski obuhvat revizije odnosio se na period 2019–2021. godine, a analizirani su i dostupni podaci za 2022. godinu.

Uprkos značaju osiguranja robnih rezervi, provedena revizija je pokazala da u FBiH nije osigurano efikasno upravljanje robnim rezervama. Postojeći regulatorni i institucionalni okvir koji uređuje oblast robnih rezervi u FBiH ne predstavlja adekvatne pretpostavke za sistemsko upravljanje robnim rezervama, zbog čega svaka direkcija svoje aktivnosti provodi samostalno, bez uspostavljene koordinacije s ostalim direkcijama.

Podzakonski akti na osnovu kojih se utvrđuju potrebe robnih rezervi pojedinačno po stanovniku nisu odgovarajući, niti je jasno propisana obaveza izrade bilansa, odnosno utvrđivanja obima i strukture potrebnih roba. Također, zakoni o robnim rezervama nisu adekvatno uredili pitanje tajnosti podataka. Nisu usklađeni sa Zakonom o zaštiti tajnih podataka, zbog čega nije osigurana potrebna i dovoljna transparentnost u ovoj oblasti.

Utvrđeno je da su neke direkcije provodile postupke nabavki roba po Zakonu o javnim nabavkama, a neke po izuzeću od primjene ovog Zakona. Međutim, postupci nabavki po izuzeću u nekim slučajevima nisu bili dovoljno transparentni.

U posmatranom periodu, bez obzira na stanje izazvano pandemijom COVID-19 i poremećaje na tržištu izazvane inflacijom, energetsom krizom i ratnim dešavanjima u Ukrajini, **direkcije nisu intervenisale robnim rezervama radi stabilizacije tržišta. Intervencije su u najvećoj mjeri bile usmjerene na pomoć ugroženim kategorijama stanovništva.** Prisutna su značajna kašnjenja u realizaciji mjera usmjerenih ka poljoprivrednicima i socijalno ugroženim kategorijama stanovništva, koje je u tekućoj godini započela Federalna direkcija.

Imajući u vidu značaj robnih rezervi u prevazilaženju vanrednih situacija, Ured za reviziju cijeni da je **sistem neophodno suštinski reorganizirati, kako bi se uspostavila odgovarajuća koordinacija između postojećih direkcija te efikasniji i ekonomičniji sistem upravljanja robnim rezervama u Federaciji BiH.**

Prilikom provođenja revizije korišteni su podaci koji su, prema postojećim zakonima o robnim rezervama, označeni kao državna tajna, odnosno programi/planovi i podaci o poslovanju direkcija robnih rezervi u FBiH. Shodno navedenom, Ured za reviziju je, postupajući u skladu sa Zakonom o reviziji institucija u FBiH, Izvještaj o provedenoj reviziji dostavio Parlamentarnoj komisiji odgovornoj za reviziju kao povjerljivu informaciju.

Za potrebe informisanja javnosti sačinjen je Izvještaj revizije učinka koji ne sadrži tajne podatke i koji je dostupan na internet-stranici Ureda za reviziju: www.vrifbih.ba.



GENERALNI REVIZOR
DŽEVAD NEKIĆ